

四庫全書

子部

欽定四庫全書

冊府元龜卷二百九十四 宋 王欽若等 撰

宗室部

退讓 專政

退讓

易曰卑而不可踰書美羣后德讓蓋讓之為德也其至矣哉矧乃聯華帝冒廁於藩戚而能識知退之理踐崇讓之言思害盈福謙之誡杜過制失軌之漸是之謂令

德也三代以上靡得而記漢室而下訖於隋唐乃有固守謙退不求聞達邈畏盛滿捨去權寵或稱疾以求奉祀或辭賞以懼公議或願寢殊禮以申素志或表讓兵政以授能者或退身以弭天變或推功以避封爵斯皆深達損益之理能守止足之訓蓋富而無驕寵而能降者素士之所難也矧於公族乎斯足以稱賢矣

漢楚元王孫辟疆武帝時隨二千石論議冠諸宗室清靜少欲不肯仕

後漢順陽懷侯嘉光武族兄也建武三年到雒陽從
征伐拜為千乘太守六年病上書乞骸骨徵詣京師

城陽王祉光武族兄春陵康侯敞之子也建武十一年
祉疾病上城陽王璽綬願以列侯奉先祭祀帝自臨其
疾

東海恭王疆光武子也建武二十年帝優以大封兼食
魯郡合二十九縣賜虎賁旄頭宮殿設鍾虡之懸擬於
乘輿疆臨之國數上書讓還東海又因皇太子固辭帝

不許深嘉歎之

東平王蒼光武子也為驃騎將軍位在三公上永平四年蒼以在朝數載多所隆益而自以至親輔政聲望日重意不自安上疏歸職曰臣蒼疲駑特為陛下慈恩覆護在家被教導之仁升朝蒙爵命之首制書褒美班之四海舉負薪之才負薪喻小人也升君子之器凡匹夫一介尚不忘簞食簞竹器也圓曰簞方曰筥之惠况臣居宰相之位同氣之親哉宜當暴骸骨為百僚先而愚頑之質加以固病誠

羞負乘辱汗輔將之位將被詩人三百赤紱之刺

赤紱大夫

之服今方域晏然要荒無敵將遵上德無為之時也文官

猶可并省武職尤不宜建昔象封有庫不任以政誠由
愛深不忍揚其過惡前事之不忘來事之師也自漢興
以來宗室子弟無得在公卿位者惟陛下審覽虞帝優
養母弟遵承舊典終卒厚恩乞上驃騎將軍印綬退就
藩國願蒙哀憐帝優詔不聽其後數陳乞辭甚懇切五
年乃許還國而不聽上將軍印綬章帝建初六年詔沛

濟南東平中山四王贊皆勿名蒼既至升殿乃拜天子
親答之其後諸王入宮輒以輦迎至省閣乃下蒼以受
恩過禮情不自寧上䟽辭曰臣聞貴有常尊賤有等威
卑高列序上下以理陛下至德廣施慈愛骨肉既賜奉
朝請咫尺天儀而親屈至尊降禮下臣每賜讌見輒興
席改容中宮親拜事過典故臣惶怖戰慄誠不自安每
會見踧踖無所措置此非所以章示羣下安臣子也帝
省奏歎息愈褒賞焉

晉齊獻王攸武帝子也帝詔議藩王令自選國內長
吏攸奏議曰昔聖王封建萬國以親諸侯軌迹相承莫
之能改誠以君不世居則人心偷幸人無常主則風俗
偽薄是以先帝深覽經遠之統思復先哲之軌分土畫
疆建爵五等或以進德或以酬功伏惟陛下應期創業
樹建親戚聽使藩國自除長吏而今草創制度初立雖
庸蜀順軌吳猶未賓宜俟清泰乃議復古之制書比三
上輒報不許其後國相上長吏缺典書令請求差選攸

下令曰忝受恩禮不稱惟憂至於官人叙才皆朝廷之事非國所宜裁也其令自上請之時王家人衣食皆出御府攸表租秩足以自供求絕之前後十餘上帝不許會稽文孝王道子簡文子也孝武太元初拜散騎常侍中軍將軍進驃騎將軍後公卿奏道子親賢莫二宜正位司徒固讓不拜使錄尚書六條事尋加開府領司徒及謝安薨詔曰新喪哲輔華戎未一自非明賢懋德莫能綏御內外司徒琅邪王道子體道自然神識穎達實

當且奭之重宜摠二南之任可領揚州刺史錄尚書假
節都督中外諸軍事衛府文武一以配驃騎府讓不受
數年領徐州刺史太子太傅公卿又奏宜進位丞相揚
州牧假黃鉞羽葆鼓吹並讓不受及恭帝為琅邪王道
子受封會稽國并宣城為五萬九千戶安帝踐阼有司
奏道子宜進位太傅揚州牧中書監假黃鉞備殊禮固
讓不拜又解徐州詔內外衆事動靜諮之帝既冠道子
稽首歸政王國寶始總國權勢傾朝廷王恭乃舉兵討

之道子懼收國寶斬之乃乞解中外都督錄尚書以謝方岳詔不許

武陵威王晞孝武帝子初穆帝時為太宰海西公太和初加羽葆鼓吹入朝不趨贊拜不名劍履上殿皆固讓宋臨川烈武王道規高祖少弟也為輔國將軍以義勲遷使持節都督荆寧秦梁雍司州之河南六州軍事領護南蠻校尉荊州刺史道規辭南蠻以授殷叔文

臨川王義慶道規子也元嘉中為丹陽尹加右僕射會

太白犯左執法義慶懼有災禍乞求外鎮文帝詔譬之
曰玄象茫昧既難可了且史家諸占各有異同兵星王時
有所干犯乃桓玄當誅以此言之益無懼也鄭僕射亡
後左執法嘗有變王光祿至今平安日蝕三朝天下之
至忌晉孝武初有此異彼庸主耳猶竟無佗天道輔仁
福善謂不足橫生憂懼兄與後軍各受內外之任本以
維城表裏經之盛衰此懷實有由來若天必降災寧可千
里逃避耶既非達者之事又不知吉凶定所若在都則有

不測去此必保利貞者豈敢苟違天耶義慶固求解僕射乃許之加中書令進號前將軍常侍尹如故

江夏文獻王義恭武帝子也武帝即位授持節都督揚州南徐二州諸軍事孝建元年十一月遷鎮京口二年春督東南兗二州徵為揚州刺史加入朝不趨贊拜不名劍履上殿義恭固辭殊禮又解持節都督南譙王義宣武帝子也文帝時為中軍將軍揚州刺史值元凶弒立孝武入討義宣遣參軍徐遺寶率衆三千

助為前鋒孝武即位以義宣為中書監都督揚豫二州丞相錄尚書六條事改封南郡王進謚義宣所生為獻太妃封次子宜陽侯愷為南譙王食邑千戶義宣固辭內任及愷王爵於是改授都督荆湘雍益梁寧南秦八州諸軍荆湖二州刺史持節侍中丞相如故降愷為宜陽縣主南平穆王鐸文帝第四子也元嘉二十六年進號平西將軍讓不拜

始安王休仁文帝第十二子明帝即位為揚州刺史時

諸方逆命休仁督征討諸軍事中流平定休仁之力也
乃增休仁邑四千戶固辭乃受千戶上流雖平薛安都
據彭城招引後魏復都督北討諸軍事又增食邑三千
戶不受

南齊豫章王嶷太子第二子也武帝永明元年領太子
太傅鮮中書監手啓帝曰陛下以叡孝纂業萬寓維新
諸弟有序臣屢荷隆愛叨授台首不敢固辭俛仰祇寵
心魂如失負重量力古今同規臣窮生如浮質操空素

任居鼎石已移氣序自頃以來宿疾稍纏心慮恍惚表
於容狀視此根體常恐命不勝恩加以星緯屢見災祥
雖脩短有常能不耿介此心欲從俗啟解今職但厝辭
為鄙或貽物誚所以息意緘默一委時運而可復加寵
榮增其顛墜且儲傳之重實非常選遂使太子見臣必
東帶宮臣皆再拜二三之宜何以當此臣近亦侍言太
子告意子良且因王儉申啟未知粗上聞否福慶方隆
國祚永始若天假臣年得預入位唯當請降貂璫以飾

微軀永侍天顏以惟畢世此臣之願也服之不衷猶為
身災况寵爵乎殊榮厚恩必誓以命請帝答曰事中恐
不得從所陳三年文惠太子講孝經畢求解太傅不許
皇孫婚竟又陳解詔曰公惟德惟行無所厝辭且魯且
衛其誰與二方式範當時流聲史籍豈容屢秉撝謙以
乖期寄疑嘗慮盛滿又因宮宴求解揚州授竟陵王子
良帝終不許曰畢汝一世無所多言疑自以地位隆重
深懷退讓北宅舊有園田之美乃盛脩理之七年啟求

還第帝令世子蕙代鎮東府崑進位大司馬八年給卓
輪車尋加中書監固辭

梁臨川靖惠王宏太祖第六子也宏有七子正義正德
正則正立正表正信世子正仁為吳興太守有治能天
監十年卒謚曰哀世子無子高祖詔羅平侯正立為世
子由宏意也宏薨正立表讓正義為嗣高祖嘉而許之
封正立千戶侯正義先封平樂侯正德西豐侯正則樂
山侯正立羅平侯正表封山侯正信封化侯

長沙元王弟藻文帝孫也武帝天監十年自南琅邪太守入為侍中藻性謙退不求聞達後出為丹陽尹大通六年入為尚書左僕射加侍中藻固辭不就詔不許後魏武昌簡王平原道武子河南王暉之孫也平原有五子長子和為沙門捨其子顯以爵讓其次弟鑒鑒固辭詔許鑒身終之後令顯襲爵鑒乃受之

京兆王繼道武曾孫南平王霄第二子也以藩王宿官舊貴孝文時厯內外顯任意遇已隆靈太后臨朝入居

心膂蕙處門下厯轉台司繼子又居權重榮赫一世繼
頻表遜位乞以司徒授崔光詔遣侍中安豐王延明給
事中黃門侍郎盧同敦勸繼又啟固讓轉太保侍中如
故加後部鼓吹頻表陳辭不許又轉太傅侍中如故頻
讓不許又遣使敦勸乃受之靈太后臨朝除特進驃騎
將軍侍中領軍如故繼頻表固辭許之及門下八座奏
追論繼太和中慰諭高車安輯四鎮之勲增邑一千五
百戶繼又上表陳讓詔聽減五百

陽城王長壽景穆之子也長壽子徽為吏部尚書加侍中征東將軍遷武衛將軍右光祿大夫拜尚書左僕射轉車騎將軍儀同三司固辭不拜聽解侍中然後受詔後以從莊帝北巡之功除侍中大司馬太尉公邑二萬戶徽表辭官封前後屢上又啟云河上之功將士之力求回所封加諸勲義微為莊帝親侍內懼爾朱榮等故有此辭以防外議莊帝識其意聽其辭封不許讓官

彭城王勰獻文子也孝文時為中書監侍中孝文南討

漢陽假勳中軍大將軍加鼓吹一部勳以寵授頻頻乃
面陳曰臣聞兼親踈而兩並異同而建此既成文於昔
臣願誦之於後陳思求而不允愚臣不請而得豈但今
古云殊遇否大異非徒曹植遠羨於臣是亦陛下賤魏
文而不顧帝大笑執勳手曰二曹才名相忌吾與汝以
道德相親緣此而言無慙前烈汝但克已復禮更何多
及又從孝文征沔北及車駕還京行飲至策勛之禮增
邑一千戶勳辭曰臣受遇緣親榮枯事等以此獲賞深

乖情願之追成旨用息謗言詔以勰為司徒太子太傅
高陽王雍獻文子也靈太后時鎮司州牧詔雍乘步挽
出入掖門又以本官錄尚書事雍頻表辭遜優荅不許
詔侍中敦諭

廣陵王羽獻文子也領廷尉卿車駕南討命羽留守羽
表辭廷尉不許

趙郡王幹獻文子也幹子諶為鴻臚少卿遷後將軍泗
州刺史固辭不拜後以親例封上蔡縣開國公食四百

戶讓而不受

後周齊王憲太祖第五子高祖時累有戰功自以威名日重潛思屏退及帝欲親征北蕃乃辭之以疾帝變色曰汝若憚行誰為吾使憲懼曰臣陪奉鑾輿誠為本願但身嬰疹疾不堪領兵帝許之

隋觀德王雄高祖族子也初改封安德王歲餘授懷州刺史尋拜京兆尹帝親征吐谷渾詔雄總管澆河道諸軍及還改封觀德王上表讓曰臣早逢興運預班末屬

有命有時藉風雲之會無才無德濫公卿之首蒙先皇
不次之賞荷陛下非分之恩久紊台槐常慮盈滿豈可
仍叨匪服重竊鴻名臣實面墻敢緣往例臣誠昧寵交
懼身責昔劉賈封王豈備二階之任曹洪上將寧超五
等之爵况臣袞章踰於帝子京尹亞於皇枝錫土列藩
紐金開國於臣何以自處在物謂其垂分是以露款執
愚蘄恩固守伏願陛下曲留睿炤特鑿丹誠頻觸宸嚴
伏增流汗優詔不許

唐宋王成器睿宗子也玄宗先天初進位太尉成器固辭太尉之命帝嘉其意許之制曰宋王成器溫良恭儉明允篤誠朕之元昆人之師表間者鼎席虛位台陞俟能堅守讓詞願移成命宜聯華於補職更叅議於論道可開府儀同三司開元十四年兼太常卿成器又上言曰臣聞選賢任職量能授官苟非其才坐貽厥咎臣本愚劣累忝榮任叨居禮樂之司實乖河海之任吹庭鍾鼓克諧謝於昔人踈署威儀為政慙於往哲僂俛從事

于茲六年詩稱素餐於是乎在伏惟開元神武皇帝陛下
繼業昭暢仁化清和乘暇奏薰風之琴追賞聚雲和
之曲典章斯備雅亮攸歸遠美咸英獨冠區宇臣幸膺
國戚久亞台陛兼管寺卿實黷朝憲惡盈之誠列在前
經過寵之談復聞斯日願矜其庸昧授以良能人無異
言官無曠位伏使晨趨北闕奉漢幄之龍顏夕赴西園
飛魏庭之華蓋則臣之願畢矣聖主之恩深矣不任竦
望翹勤之至謹詣朝堂奉表陳讓以聞帝覽表重違其

意手詔曰開府儀同三司兼太常卿寧王憲秉德夷遠
體道淳深頃以茂親典司宗社禮經之文既備鍾律之
度已和成而不居謙以自牧固辭兼領情所重違宜遂
雅懷俾停劇務

專政

夫並建周親藩屏王室所以深根固本為不可拔者也
故詩曰大宗維翰又曰懷德維寧是以內有骨肉之親
外有藩翼之衛強弱相制枝葉相持此周漢所以為德

也吳晉之後法制過差始以親親假其勢位終以驕蹇
顯乎威福或本根之莫庇或干戈之日尋小者踰越法
度大者傾敗邦政斯所謂寵之適所以禍之也得失之
際可不鑒哉是以著其始終盛衰之變以存歷代之戒
焉

魏曹爽太祖族子真之子也為大將軍假節鉞都督中
外諸軍事錄尚書事封武安侯邑萬二千戶賜劔履上
殿入朝不趨贊拜不名丁謚畫策使爽白天子發詔轉

宣王為太傅外以名號尊之內欲令尚書奏事先來由已得制其輕重也

吳孫峻大帝末為侍中受遺輔政領武衛將軍既誅諸葛恪遷吳丞相大將軍督中外諸軍事初羣臣上奏共推峻為太尉議滕胤為司徒時有媚峻者以為大統宜在公族若滕胤為亞公聲名素重衆心所附不可貳也乃表以峻為丞相又不置御史大夫士人皆失望矣

孫綝廢帝時自偏將軍代孫峻為侍中武衛將軍領中

外諸軍事知朝政景帝時絀一門五侯皆典禁兵權傾人主自吳國朝臣未嘗有也

晉趙王倫既誅賈后遂為使持節大都督中外諸軍事相國侍中一依宣文輔魏故事百官總已聽於倫

齊王冏既誅趙王倫因留輔政坐拜百官符勅臺府淫濫尊驕不一朝覲此狂恣不肅之容也天下莫不高其功而慮其亡也冏終弗改遂至夷滅

成都王穎為太尉大將軍都督中外諸軍假節加黃鉞

錄尚書事鎮業及齊王冏之敗頴懸執朝政事無巨細皆就鄴諮之

東安王繇既誅楊駿後專斷刑賞威震內外

會稽王道子為錄尚書都督中外諸軍事世子元顯時年十六為侍中心惡王恭請道子討之乃拜元顯為征虜將軍其死衛府及徐州文武悉配之于時王恭威鎮內外道子甚懼復引譙王尚之以為腹心尚之說道子曰藩伯彊盛宰相權輕密宜樹置以自藩衛道子深以

為然乃以其司馬王愉為江州刺史以備恭與尚之等
日夜謀議以伺四方之隙王恭知之復舉兵以討尚之
為名荊州刺史殷仲堪豫州刺史庾楷廣州刺史桓玄
竝應之道子使人說楷曰本情相與可謂斷金往年帳
中之飲結帶之言寧可忘邪卿今棄舊交結新援忘王
恭疇昔陵侮之耻乎若乃欲委體而臣之若恭得志以
卿為反覆之人必不相信何富貴可保禍敗亦旋及矣
楷怒曰王恭昔赴山陵相王憂懼無計我知事急即勒

兵而至去年之事亦俟命而奮我事相王無相負者既不距恭反殺國寶自爾已來誰復敢攘袂於君之事乎庾楷實不能以百口助人屠滅當與天下同舉誅鉏姦臣何憂府不開爵不至乎時楷已應恭檄正徵士馬信反朝廷憂懼於是內外戒嚴元顯攘袂慷慨謂道子曰去年不討王恭致有今役若復從其欲則太宰之禍至矣道子曰飲醇酒而委事於元顯元顯雖年少而聰明多涉志氣果銳以安危為己任尚之為之羽翼時相傳

會者皆謂元顯有明帝神武之風於是以為征討都督
假節統前將軍王綯左將軍謝琰及將軍桓之才毛泰
高素等伐恭滅之既而楊佺期桓玄殷仲堪等復至石
頭元顯於竹里馳還京師遣丹陽尹王愷鄱陽太守桓
放之新蔡內史何嗣潁川太守溫詳新安太守孫泰等
發京邑士庶數萬人據石頭以拒之道子將出頓中堂
忽有驚馬蹂藉軍中因而擾亂赴江而死者甚衆仲堪
既知王恭敗死狼狽西走與桓玄屯于潯陽朝廷嚴兵

相距內外騷然詔元顯甲仗百人入殿尋加散騎常侍
中書令又領中領軍持節都督如故會道子有疾加以昏醉
元顯知朝望去之謀奪其權諷天子解道子揚州司徒
而道子不之覺元顯自以少年頓居權重慮有譏議於
是以琅邪王領司徒元顯自為揚州刺史既而道子酒
醒方知去職於是大怒而無如之何廬江太守會稽張
法順以刀筆之才為元顯謀主交結朋援多樹親黨自
桓謙以下諸貴遊皆歛衽請交元顯性苛刻生殺自己

法順屢諫不納又發東土諸郡免奴為客者號曰樂屬
移置京師以充兵役東土翯然人不堪命天下苦之矣
既而孫恩乘釁作亂加道子黃鉞元顯為中軍以討之
又加元顯錄尚書事然道子更為長夜之飲政無大小一委
元顯時謂道子為東錄元顯為西錄西府車騎填塞東第
門下可設雀羅矣元顯無良師友正言弗聞諂譽日至
或以為一時英傑或謂為風流名士由是自謂無敵天
下故驕侈日增帝又以元顯有翼亮之功加其所生母

劉氏為會稽王夫人金章紫綬會雒陽覆沒道子以山陵幽辱上䟽送章綬請歸藩不許及太皇太后喪詔道子乘輿入殿元顯因諷禮官下議稱已德隆望重既錄百揆內外羣僚皆應盡敬於是公卿皆拜于時軍旅荐興國用虛竭自司徒已下日廩七升而元顯聚斂不已富過帝室及謝琰為孫恩所害元顯求領徐州刺史加侍中後將軍開府儀同三司都督十六州諸軍事封其子彥璋為東海王尋以星變元顯解錄復加尚書令會孫

恩至京口元顯柵斷石頭率兵距戰頗不利道子無佗
謀畧唯日禱蔣侯廟為厭勝之術既而孫恩遁于
北海桓玄復據上流致牋於道子曰賊造近郊以風不
得進以雨不致火食盡故去耳非力屈也昔國寶卒後
王恭不乘此威入統朝政足見其心非侮於明公也而
謂之非忠今之貴要腹心有時流清望者誰乎豈可云
無佳勝直是不能信之耳用理之人然後可以信義相
期求利之徒豈有所惜而更委信邪爾來一朝一夕遂

成今日之禍矣阿衡之重言何容易求福則立至于忤
或致禍在朝君子豈不有懷但懼害及身耳玄忝任在
遠是以披寫事實元顯覽而大懼張法順謂之曰桓玄
承藉門資素有豪氣既并殷楊專有荆楚然桓氏世在
西藩人或為用而第下之所控引止三吳耳孫恩為亂
東土塗地編戶饑饉公私不贍玄必乘此縱其奸竄竊
用憂之元顯曰為之奈何法順曰玄始據荊州人情未
輯方就綏撫未遑佗計及其如此發兵誅之使劉牢之

為前鋒而第下以大軍繼進桓玄之首必懸於麾下矣
元顯以為然遣法順至京口謀於牢之而牢之有疑色
法順還說元顯曰觀牢之顏色必二於我未若召入殺之
不爾敗人大事元顯不從道子尋拜侍中太傅置左右
長史司馬從事中郎四人崇異之儀備盡盛典其驃騎
將軍僚佐文武即配太傅府加元顯侍中驃騎大將軍
開府征討大都督十八州諸軍事儀同三司加黃鉞班
劍二十人以伐桓玄竟以牢之為前鋒法順又言於元顯

曰自舉大事未有威斷桓謙兄弟每為上流耳目斬之
以孤荆楚之望且事之濟不繼在前軍而牢之反覆萬
一有變則禍敗立至可令牢之殺謙兄弟以示不貳若
不受命當逆為其所元顯曰非牢之無以當桓玄且始
事而誅大將人情必動二三不可于時揚土饑虛運漕
不繼玄斷江路商旅遂絕於是公私匱乏士卒唯給糗
橡大軍將發玄從兄驃騎長史石生馳使告玄玄進次
尋陽傳檄京師罪狀元顯俄而玄至西陽帝戎服餞元

顯于西池始登舟而玄至新亭元顯棄船退屯國子學堂明日列陣於宣陽門外元顯佐吏多散走或言玄已至大桁劉牢之遂降于玄元顯迴入宣陽門牢之叅軍張暢之率衆逐之衆潰元顯奔入相府唯張法順隨之問計於道子道子對之泣玄遣太傅從事中郎毛泰收元顯送於新亭縛於舫前而數之元顯答曰為王誕張法順所誤于是送付廷尉并其六子皆害之玄又奏道子酣縱不孝當棄市詔徙安成郡使御史杜竹林防衛竟承

玄旨酖殺之時年三十九帝三日哭於西堂

宋彭城王義康為侍中都督南徐兗三州諸軍事司徒錄尚書事南徐州刺史與揚州刺史王弘共輔朝政弘既多疾且每事推謙自是內外衆務一斷之義康性好吏職銳意文案既專總朝權事決自己生殺大事以錄命斷之凡事陳奏無不可方伯已下並委義康授用由是朝野輻湊勢傾天下

後魏元義江陽王繼之第二子靈太后臨朝以義妹夫

累遷侍中領軍既在門下兼總禁兵深為靈太后所信
委及清河王懌被殺與高陽王雍等輔政常直禁中孝
明呼為姨夫自後專綜機要巨細決之威震於內外百
寮重跡

後周晉公宇文護文帝之兄子也為大冢宰武帝立百
官總於護自文帝為丞相立左右十二軍總屬相府後
皆受護處分凡所徵發非護不行護屯兵禁衛盛於宮
闕事無巨細皆先斷後聞

大正十一年

册府元龜

二十三

冊府元龜卷二百九十四

欽定四庫全書

冊府元龜卷二百九十五 宋 王欽若等 撰

宗室部

復爵

自周成以來竝建懿戚大啓土宇所以彊幹弱枝傳祚遐世顧豈欲絕之者哉其或反道敗德弗率王庭作威弛禁侵害吏治則削而絀之用殄厥世斯益不得已而為之也然後推敦族之恩申猶宥之典赦其罪戾還其

璽綬或則加禮謚於既沒復爵土於嗣子俾宗祊無損
邦畿如舊霈然渥緝與之更始亦有被誣見疑非辜邁
禍率用追復以申其寃斯皆厚親親之仁成亢宗之美
也

漢淮南王長高祖少子以謀反遷蜀道死民有作歌歌
淮南王曰一尺布尚可縫一斗粟尚可舂兄弟二人不
相容

一尺布可縫而共衣一斗粟可舂而共食况以天下之廣而不相容也

文帝聞之曰

昔堯舜放逐骨肉周公殺管蔡

蘇及共工皆堯舜之同姓故云骨肉

天下

稱聖不以私害公天下豈以為我貪淮南地邪迺徙城陽王王淮南故地而追尊淮南王為厲王置園如諸侯儀

後漢楚王英以逆謀廢徙丹陽涇縣明年至丹陽自殺詔遣光祿大夫持節弔祠贈賻如法加賜列侯印綬以諸侯禮葬於涇元和三年又遣謁者備王官屬迎英喪改葬彭城加王赤綬羽蓋華藻如嗣王儀追爵謚曰楚厲侯

阜陵王延以逆謀貶爵為侯章帝行幸九江賜延書與車駕會壽春帝見延及妻子愍然傷之乃下詔曰昔周之爵封千有八百而姬姓居半者所以楨榦王室也朕南巡望淮海意在阜陵遂與侯相見侯志意衰落形體非故瞻省懷感以喜以悲今復侯為阜陵王增封四縣并前為五縣

齊王晃光武兄伯升曾孫晃與太姬宗更相誣告章和元年有司奏請免晃爵為庶人徙丹徙帝不忍下詔貶

晃爵為蕪湖侯遣謁者收晃璽綬晃立十七年而降爵
晃卒子無忌嗣帝以伯升首創大業而後嗣罪廢心常
愍之時北海亦絕無後詔令復二國永元二年乃復封
無忌為齊王

勃海王惺謀為不道有司請廢之桓帝不忍貶為瘿陶
王食一縣惺後因中常侍王甫求復國許謝錢五十萬
桓帝遺詔復為渤海王

魏已氏公琮坐於中上方作禁物貶爵都鄉侯明帝景

初三年復已氏公

吳齊王奮廢徙章安廢帝太平三年封為章安侯詔曰
齊王奮前坐殺吏廢為庶人連有赦令獨不見原縱未宜
復王何以不侯又諸孫兄弟作將列在江渚孤有兄獨
爾云何有司奏可就拜為侯

晉高陽王睦宣帝弟子也初封中山王坐誘逋亾貶封
丹水縣侯太康初詔復爵有司奏封江陽王武帝曰睦
退靜思愆改脩其德今有爵土不但以赦江陽險遠其

以高陽郡封之乃封為高陽王

汝南王亮為楚王瑋所害及瑋誅追復亮爵位喪葬之禮如安平獻王孚故事廟設軒懸之樂

汝南郡王羨汝南王亮之子永興初為侍中以長沙王又黨廢為庶人惠帝還雒復羨封為撫軍將軍又以汝南期思西陵益其國

齊王冏為長沙王又所害惠帝光熙初追冊曰咨故大司馬齊王冏昔以宗藩穆裔紹世緒于東國作翰許京

允鎮靜我王室誕率義徒同盟觸澤克成元勲大濟頽
東朕用應嘉茂績謂篤爾勞俾式先典以疇茲顯懿廓
土殊分跨兼吳楚崇禮備物寵侔蕭霍庶憑翼戴之重
永隆邦家之望而恭德不建取侮二方有司過舉致王
于戮古人有言曰用其法猶思其人况王功濟朕身勲
存社稷追惟既往有悼於厥心哉今復王本封命嗣子
還紹厥緒禮秩典度一如舊制使持節大鴻臚即墓賜
策祠以太牢魂而有靈祇奉朕命肆寧爾心嘉茲寵榮

子超嗣爵永嘉中懷帝下詔重述罔倡義元勲還贈大司馬加侍中假節追謚

成都王穎既死汲桑載穎棺於軍每事啓靈以行軍令桑敗棄棺於故井中穎故臣收之改葬於雒陽懷帝加以縣王禮

東安王繇以專行誅賞兄澹因隙譖之汝南王亮惑其說免繇官以公就第坐有悖言廢徙帶方惠帝永康初徵繇復封後遭母喪在鄴勸成都王穎解兵為穎所害

永寧元年九月追復其爵

河間王顥安平獻王孚孫為南陽王模使人扼殺之武帝咸和六年六月復顥爵位

棘陽王竒義陽王望孫望薨竒襲坐遣三部吏到交廣商貨為有司所奏武帝太康九年詔貶為三縱亭侯復立為棘陽王

東萊王蕤齊王冏兄冏輔政蕤與左衛將軍王輿謀共廢冏事覺免為庶人尋詔徙蕤上庸後封微陽侯上庸

內史陳鍾承罔旨害蕤罔死詔誅鍾復蕤封改葬

吳王晏武帝子與兄淮南王允共攻趙王倫允敗倫貶晏為賓徒縣王後徙封代王倫誅復本封

武陵王晞為太宰為桓溫所忌溫逼新蔡王晃自誣與晞及晞子綜等謀逆請誅之簡文帝不許溫奏徙新安

郡家悉徙之太元六年晞卒孝武帝三日臨于西堂詔曰感惟摧慟便奉迎靈柩并改移妃應氏及故世子梁王諸喪家屬悉還復下詔曰故前武陵王體自皇極尅

已思愆仰惟先朝仁宥之旨豈可情理靡寄其追封新寧郡王邑一千戶十二年追復晞武陵國王

梁王璿晞子出繼梁王翹與父晞俱廢薨子蘇嗣孝武太元中復國

宋廬陵王義真高祖子也少帝失德徐羨之等密謀廢立則次第應在義真以義真輕眇不任主社稷因其與少帝不協乃奏廢為庶人徙新安郡景平二年六月羨之等遣使殺於徙所文帝元嘉元年八月詔曰前廬陵

王靈樞在遠國封墮替感惟摧慟情若貫割王體自至
極地戚屬尊豈可令情禮永淪終始無寄可追復先
封特遣奉迎并孫脩華謝妃一時俱還言增摧哽三年
正月誅徐羨之傅亮等是日詔曰故廬陵王含章履正
英哲自然道心內昭徽風遐被遭時多難志匡權逼天
未悔禍運鍾屯險群凶肆醜專竊國柄禍心潛構釁生
不圖朕每永念雙言耻含痛內結遵養奸慝情禮未申今
王道既亨政刑始判宣昭國章於是乎在可追崇侍中

太將軍王如故庶慰冤魂少申悲憤

江夏王義恭高祖子也為前廢帝所害太宗定亂令書
曰故中書監太宰領太尉錄尚書事江夏王道性淵深
睿鑒通遠樹聲列藩宣風鉉德位隆姬輔任屬負圖勤
勞國家方熙託付之重盡心毗道永融雍穆之化而凶
醜忌威奄加冤害夷戮有暴殞空無聞憤達幽明痛貫
朝野朕蒙險在難含哀莫申幸賴宗社之靈克纂祈天
之祚仰惟勲威震慟厥心昔梁王徵庸警蹕備禮東平

好善黃屋在御况公德猷弘懋彛典未殊者哉可追崇
使持節侍中都督中外諸軍事丞相領太尉中書監錄
尚書事如故給九旒鸞輅虎賁班劍百人前後部羽葆
鼓吹輜輶車

安隆王叡江夏王義恭子為元凶所害孝武大明二年
追封安隆王追謚宣王

贈江夏王伯禽亦義恭子也伯禽官輔國將軍為前廢
帝所害謚曰哀世子又追贈江夏王改謚曰愍

始平王子鸞孝武之子孝武諸子多為前廢帝所害廢
帝素疾子鸞有寵遣使賜死同生弟妹竝死及明帝即
位詔曰夫紆冤伸痛雖往必追緣情測愛感事彌遠故
使持節都督南徐州諸軍事撫軍南徐州刺史新安王
子鸞夙表成器早延殊寵方樹美業克光藩維而凶心
肆忌奄罹橫禍興言永傷有兼常懷宜旌天秀以雪沉
魂可贈使持節侍中都督南徐兗二州諸軍事司徒南
徐州刺史王如故第二皇子子師俱嬰謬酷有增酸悼

子師復先封為南海王竝加徽謚

南齊明帝初輔政所誅諸王及即位後復屬籍各封諸子為侯

梁長沙元王弟藻武帝普通三年遷領軍將軍加侍中
六年為軍師將軍與西豐侯正德北伐渦陽輒班師為
有司所奏免官削爵土七年起為宗正卿八年復封爵
臨賀王正德普通六年逃奔于魏七年又自魏逃歸高
祖不之過也復其封爵

後魏河間公齊太武時坐事免官爵後為前將軍尅仇池威震羌氏復賜爵河間公

襲江陽王繼為青州刺史後入為度支尚書繼在青州之日民饑餒為家僮取民女為婦妾又以良人為婢為御史所彈坐免官爵靈太后臨朝復繼尚書本封

襲廣陽王淵為葛榮所害莊帝追復王爵謚曰忠武

汝陰王天賜為懷朔大將軍坐貪殘恕死削除官爵卒孝文哭於思政觀贈本爵葬從王禮謚曰靈王

東平王匡為度支尚書又兼宗正卿每有奏請尚書令
任城王澄時致執奪匡剛隘內遂不平澄因是奏匡罪
狀三十餘條廷尉處以死刑詔付八議特加原宥削爵
除官孝明孝昌初卒追復本爵改封濟南王

中山王英為鎮南將軍行揚州梁遣將寇肥梁詔英率
衆討之英表云可尅後水盛英及諸將狼狽奔退士衆
沒者十五六有司奏英經筭失圖案劾處死詔恕死為
民後復王封邑千戶

樂陵王思譽為鎮北大將軍及穆泰陰謀不軌思譽知而不告怒死削封為庶人孝文太和末復還其王爵

京兆王愉出為冀州刺史謀逆事敗見執徵赴京師至野王絕氣而死或云高肇令人殺之後靈太后令愉之四子皆附屬籍追封愉臨洮王子寶月乃改葬父母追服三年

河間王琛以討鮮于脩禮敗免官爵後討汾晉胡屬卒於軍追復王爵

北海王詳獻文子也宣武親政尚書高肇譖詳與茹皓等謀為逆亂付廷尉治罪詔免為庶人別營坊館如法禁衛限以終身詳哭數聲而暴死停殯五載永平元年十月詔曰故太傅北海王體自先皇特鍾友愛受遺訓輔冲昧攸託不圖暮節晦德終缺哀榮便可追復王封尅日營厝少慰幽魂以旌陰戚謚曰平王

咸陽王禧謀反賜死後孝明正光中復禧王爵葬以王禮

襲趙郡王謚在母喪聽音聲飲戲為御史中尉李平所
彈遇赦復封

樂浪王長命坐殺人賜死除國子忠明帝時復前爵位
襲安樂王鑒為北討大都督討葛榮與都督裴衍共救
信都鑒謀反降葛榮都督源子邕與裴衍圍鑒斬首傳
雜詔改其元氏莊帝初許復本族又特復鑒王爵贈司
空

畧陽王羯兒督諸軍討禿髮坐貪暴降爵為公後統河

西諸軍襲蠕蠕至於漠南仍復王爵

廣陽王嘉之孫湛弟瑾以謀殺齊文襄王事泄合門伏法湛先有婢紫光生子法輪齊王矜湛覆滅乃慰原之復其爵土

襲京兆王大興拜長安鎮大將軍以黷貨削除官爵後除秘書監還復前爵

後周常武公會邵惠公孫初封譚國公後與晉公護同誅建德三年追復封爵常武公

唐巢王元吉高祖第四子武德元年封為齊王九年與太子建成謀逆伏誅貞觀元年追封海陵郡王謚曰刺十六年七月又詔曰有虞受終弘肆赦之典隆周革命篤親親之恩海陵刺王元吉地維藩翰夙承朝寵陷於不軌得罪君親朕嗣膺靈命無忘敦睦同生之重既切於本枝在原之悼寔纏於歲月興言泉壤思備寵章可追封巢王謚乃依舊

荆王元景高祖第六子武德三年封為趙王貞觀十年

徙封荆王永徽三年坐與房遺愛謀反賜死國除後追封沈黎王備禮改葬

韓王元嘉高祖第十一子武德四年封宋王五年徙荆王貞觀十年改封韓王垂拱四年則天誅戮宗室諸王不附已者元嘉大懼與其子黃國公及越王貞父子謀起兵坐誅神龍元年追復爵土封其第五子訥為嗣韓

王是年二月制皇室子孫諸王自垂拱已來非命者皆不埋殯宜令州縣尋求處所以牲牢致祭乃追復官

爵備禮改殯其王并令陪葬昭獻二陵有嗣者即令承襲無息嗣者取近親為後

霍王元軌高祖第十四子武德六年封蜀王八年徙封
吳王貞觀十年改封霍王垂拱四年坐與韓王元嘉連
謀起兵事覺徙居黔州至陳倉而死長子緒封江都王
坐與裴承光交通被誅神龍元年並追復爵土封緒孫
暉為霍王嗣

舒王元名高祖第十八子貞觀五年封譙王十年徙封
舒王永昌中與其子豫章王亶俱為丘神勣所陷被殺
神龍元年復其官爵仍令以禮改葬封亶子津為嗣舒

王

魯王靈夔高祖第十九子貞觀五年封魏王十年徙燕
王十四年改封魯王垂拱四年與韓王子黃國公譔結
謀起兵事洩流辰州縊死有二子長子清河王詵少子
范陽王謁亦為酷吏所陷神龍元年追復靈夔官仍令
以禮改葬封謁子道堅為嗣魯王

江夏王道宗高祖從父兄之子永徽四年房遺愛伏誅
長孫無忌褚遂良素與道宗不協上言道宗與遺愛交

結沅配象州道宗病卒及無忌遂良得罪乾封元年追復道宗官爵

吳王恪太宗第三子貞觀三年封蜀王十年徙封吳王永徽四年房遺愛謀反遂因事誅恪以絕衆望子四人仁瑋琨境竝流于嶺表尋追封恪為鬱林王又封仁為鬱林侯

蜀王愔太宗第六子吳王恪之母弟貞觀五年封梁王十年改封蜀王恪既誅愔黜為庶人徙巴州尋改為涪

陵王咸亨初追復爵土陪葬昭陵謚曰悼封子璠為嗣

蜀王

越王貞太宗第八子貞觀五年封濮王十年徙封原王
尋改封越王垂拱四年貞及其子瑯琊王冲坐與韓王
元嘉結謀起兵被誅改姓虺氏神龍元年追復王與子
冲俱復舊姓

紀王慎太宗第十子也貞觀五年封申王十年改封紀
王垂拱中越王貞將起事慎不肯同謀及貞敗慎亦下

獄臨行免改姓虺氏配流嶺表至蒲州而卒中興初追復官爵

澤王上金高宗第三子永徽元年封杞王文明元年封畢王又改澤王永昌元年出為隨州刺史武承嗣使酷吏周興誣告上金謀反召至都恐懼自縊死神龍元年追復上金官爵封庶子義珣為嗣澤王

許王素節高宗第四子永徽二年封雍王尋徙郇王改葛王又進封許王出為舒州刺史與澤王上金同被誣

告追赴都縊死則天以庶人禮葬之神龍元年追封許
王以禮改葬封少子瓘為嗣許王

成王千里吳王恪之長子本名仁封鬱林侯中興初進
封成王為左金吾衛將軍三年節愍太子謀殺武三思
兵敗與其子天水王僖俱被誅改姓虺氏景雲元年詔
曰故成王千里保國安人克成忠義願除凶醜翻陷誅
夷永言淪沒良深痛悼宜復舊官爵復本姓

歸政郡王俊吳王恪第四子本名境中興初封歸政郡

王宗正卿坐凡千里事貶南州司馬卒景雲元年追復宗正卿歸政郡王官爵

常山公倩越王貞第二子垂拱中坐與父貞凡冲連謀起兵被誅神龍初侍中敬暉等以冲父子翼戴皇家義存社稷請復其官爵武三思令上官昭容代中宗手詔不許開元四年詔追復爵土令備禮改葬

棣王琰玄宗第四子也坐二孺人不相叶乃密求巫者書符置於琰履中以求媚琰監院中官密奏於玄宗玄

宗命推問之竟孺人也玄宗猶疑琰知情乃囚於鷹狗坊中絕朝請憂懼而死代宗寶應元年贈其王位

鄂王瑤玄宗第五子開元二十五年得罪廢寶應元年追復

光王琚玄宗第八子也有才力玄宗愛之以母見疎薄嘗有怨言為人所構得罪寶應元年追復

齊王湊穆宗第六子也初封漳王後為鄭注誣告王與宋申錫謀不軌降封巢縣公卒開成三年正月追封為

齊王

梁博王友文為庶人友珪所害末帝即位詔曰我國家
賞功罰罪必叶朝章報德伸冤敢欺天道苟顯違于法
制雖蹇滯于歲時終振大綱須歸至理重念太祖皇帝
嘗開霸府有事四方迨建皇朝載遷都邑每以主留重
務居守難才慎擇親賢方應寄任故博王友文才兼文
武識達古今俾分憂於在浚之郊亦共理於興王之地
一心無易二紀于茲常施惠於士民實有勞於國家去

歲郢王友珪嘗懷逆節已露克鋒將不利於君親欲竊
窺於神器此際直先皇寢疾大漸日臻博王乃密上封
章請嚴宮禁因以萊州刺史授於郢王友珪纔覩宣頭
俄行大逆豈有自縱兵於內殿却翻事於東都又矯詔
書枉加刑戮仍奪博王封爵又改姓名寃恥兩深誑欺
何極伏賴上玄垂祐宗社降靈俾中外以叶謀致遐邇
之共怒尋平內難獲勦元凶既雪恥於同天且免譏於
共國朕方期遁世敢竊臨人遽迫推崇爰膺纘嗣寃憤

既伸於幽顯霈澤宜及於下泉博王宜却復官爵仍令有司擇日歸葬

後唐贈太保從璨明帝之諸子性剛直好客踈財意豁如也天成中為右衛大將軍時安重誨方秉事權從璨亦不之屈重誨常以此忌之明宗幸汴留從璨為大內皇城使一日召賓友於會節園酒酣之後戲登於御榻安重誨奏請誅之詔曰皇城使李從璨朕巡幸汴州使警大內乃全乖委任但恣追遊於予行從之園頻恣歌

歡之會仍施峻法顯辱平人致彼誼譁達於聞聽方當
立法固不黨親宜貶授房州司戶參軍仍令盡命長興
中重誨之得罪也詔復舊官仍贈太保

欽定四庫全書

卷二百九十五

冊府元龜卷二百九十五

欽定四庫全書

冊府元龜卷二百九十六 宋 王欽若等 撰

宗室部

追封

傳曰慎終追遠民德歸厚矣乃有聯華帝胄齒于宗盟
景命弗融邁茲短折或未極封爵之制或不及光華之
旦或遭罹橫枉沉痛載懷或帝構艱難勲業靡究繇是
舉敦族之義申追命之典以至胙土建國節惠易名加

尊極之稱升儲副之號備物典策寵章渥縟斯王者興仁敦睦化下美俗之道又豈止厚親親之恩而已哉

後漢建武十五年追謚凡伯升為齊武公兄仲為魯哀

公

又依本傳其年追謚伯升為齊武王

魏蕭懷王熊太祖子早薨黃初二年追封謚蕭懷公太和三年又追進爵為王

鄧哀王冲太祖子建安十三年薨黃初二年追贈謚冲曰鄧哀侯又追號為公太和五年加冲號曰鄧哀王

范陽閔王矩太祖子也早薨無子建安二十二年以樊安公均子敏奉矩後封臨晉侯黃初三年追封謚矩為范陽閔公五年改封敏范陽王七年徙封句陽太和六年追進矩號曰范陽閔王

豐愍王昂太祖子也太祖南征為張繡所害黃初二年追封曰悼公五年追加號曰豐悼王太和三年改謚曰愍

相殤王鑠太祖子也早薨太和三年追封謚曰殤

濟陽懷王太祖子也建安十六年封西鄉侯早薨太和四年追進爵謚曰懷公六年又進號曰懷王

廣宗殤公子棘太祖子也早薨太和五年追封謚曰殤公

鄆戴公子整太祖子也建安二十二年封鄆侯二十三年薨黃初二年追謚曰戴公

靈殤公子京太祖子也早薨太和五年追封謚

臨邑殤公子上太祖子也早薨太和五年追封謚

剛殤公子勤太祖子也早薨太和五年追封謚

樊安公子均太祖子也建安二十二年封樊侯二十四年薨黃初二年追進公爵謚曰安

穀城殤公子乘太祖子也早薨太和五年追封謚

臣欽若等

按魏裴松之注魏武諸子以母貴賤為次不計兄弟之年

贊哀王協文帝子早薨太和五年追封謚曰經殤公青龍二年更追改爵謚為王

吳長沙桓王策太帝之兄也漢末為討逆將軍會稽太

守帝稱尊號追謚策曰長沙桓王

晉隋穆王整義陽王望之子初封清泉侯先父望卒武帝以義陽一縣追封為隋縣王

城陽哀王兆字千秋文帝子年十歲而天武帝踐阼詔曰亾弟千秋少聰慧有夙成之質不幸早亡先帝先后特所哀愍每追遺意情懷感傷於是追加兆詔封謚

遼東悼惠王定國文帝子年三歲薨咸寧初追加封謚
廣漢殤王廣德文帝子年二歲薨咸寧初追加封謚

毗陵悼王軌武帝子年二歲而夭太康十年追加封謚
渤海殤王恢武帝子太康五年薨時年二歲追加封謚
南陽王彪愍懷太子子永康元年正月薨四月追封

臨川獻王郁會稽王道子之子也寧康中追封謚

宋臨川王道規高祖少弟也初以起義功封華容縣公
後為征西大將軍義熙八年薨追封南郡公高祖受命
追加封臨川王

新野懷王夷父文帝第十七子也元嘉二十九年薨時

年六歲泰始五年追加封謚

池陽縣侯懷遠晉熙王昶子也早卒明帝即位追封池陽縣侯

齊敬王子羽孝武帝第十四子太明三年生當年卒追加封謚

淮陽思王子霄孝武帝第二十三子也大明五年生八年薨追加封謚

南齊衡陽王道度太祖長兄仕至安定太守卒於宋世

建元二年追加封謚

始安貞王道生太祖次兄也宋世為奉朝請卒建元元年追加封謚

始安靖王鳳貞王子明帝兄也官至正員郎卒於宋世明帝建武元年贈始安靖王

安陸昭王緬始安貞王之子也永明九年卒明帝建武元年追贈

梁文宣侯尚之高祖從父也仕齊為步兵校尉卒官天

監初追謚

文宣侯尚之子靈鈞仕齊廣德令高祖義師至行會稽郡事項之卒高祖即位追封東昌縣侯

忠簡侯崇之高祖從父齊永明中為東陽太守時錢塘

唐瑀之反崇遇害天監初追謚

高祖踐阼封崇之子景為吳平侯乃追封謚

長沙宣武王懿高祖長兄也仕齊為尚書令東昏時遇害天監元年追崇丞相封長沙郡王謚曰宣武

永陽昭王敷高祖次兄也齊建武四年薨高祖即位追

封永陽郡王謚曰昭

衡陽王暢高祖第四弟仕齊至太常封江陵縣侯卒天監元年追封衡陽郡王謚曰宣

桂陽王融高祖弟仕齊太子洗馬永元中宣武之難融遇害天監元年追封桂陽郡王謚曰簡

陳始興昭烈王道談高祖兄也仕梁為東宮直閣將軍侯景之亂援臺中中流矢卒紹泰二年追贈義興郡公謚曰昭烈高祖受禪重封始興郡王

南康郡王休先高祖母弟梁太清中卒高祖受禪追封
南康郡王謚曰忠壯

豫章王立長沙王權皆高祖子永定二年追封立謚曰
獻權謚曰思

後魏高涼王孤平文皇帝子也道武時以孤勲高追封
高涼王謚曰神武

順陽王郁桓帝之後也文成時為殿中尚書賜爵順陽
公及乙渾專權郁從順德門入欲誅渾渾窘怖遂奉獻

文臨朝後復謀殺渾為渾所誅獻文錄郁忠正追贈順陽王謚曰簡

秦明王翰昭成帝子建國十年卒道武即位追贈秦王謚曰明王翰子愍王觚使於慕容垂垂止觚道武討中山慕容普麟害觚及平中山追封謚曰秦愍王

陳留王虔昭成孫登國初封陳留公後慕容寶來寇虔戰沒道武追惜傷慟追謚陳留桓王

江夏王呂道武族弟初以軍功封江夏公卒贈王爵

淮陵侯大頭烈帝之曾孫文成初封淮陵侯卒贈高平公

河間公齊烈帝玄孫太武時賜爵河間公卒諡曰敬

樂陵王胡兒景穆子和平四年三月追封樂陵王

章武王大雒景穆子皇興二年薨追贈征北大將軍章武郡王諡曰敬

河間王若文成帝第七子年十六未封而薨追封河間

王諡曰孝

長鄉縣侯提臨淮王譚子太武孫也以貪縱削除加罰
後詔提從駕南伐至雒陽參定遷都之議尋卒以預參
遷都功追長鄉縣侯

提子濟南王昌宣武時復封臨淮王未拜而薨贈齊州刺
史謚曰康追改封濟南王

都昌伯誘中山王熙弟也熙起兵誅元乂為其長史柳
元章等所殺誘被誅後追封都昌縣開國伯謚曰恭

東安王凝弟湛為廷尉少卿莊帝初遇害河陰贈征東

大將軍青州刺史追封漁陽王

武邑王義興景穆曾孫也初於河陰遇害永安中追封燕郡王尋改封鉅鹿王又改封武邑王

陳留王真孝莊之兄也建義元年六月追封為陳留王後周邵國惠公顥武帝伯父保定元年七月追封邵國公謚曰惠

顥子景公什肥年十五而顥沒後魏永安中太祖入關什肥不能離母遂留晉陽及太祖定秦隴什肥為齊神

武所害追贈大冢宰襲封邵公謚曰景

杞簡公連武帝伯父追賊定州戰歿保定元年七月追封杞公謚曰簡

連子烈公元寶為齊神武所害保定初追贈襲杞國公謚曰烈

莒國莊公洛生亦武帝伯父也保定元年七月追封莒公謚曰莊

洛生子穆公菩提為齊神武所害保定初追贈大將軍襲

爵謚曰穆

宋國公震文帝子也保定元年七月追封

虞國公仲武帝族祖保定元年十二月封

隋河間公元孫高祖從父也帝受禪贈尚書令河間郡公
義成縣公鍾葵高祖族祖帝受禪追贈義成縣公

蔡王整高祖弟也周明帝時賜爵陳留郡公從武帝平
齊戰死高祖受禪追封蔡王謚曰景

河間王弘高祖從祖弟也為太子太保薨大業六年追

封郇王

唐鄭王亮高祖從父隋海州刺史武德初追封

畢王璋高祖從父仕周梁州刺史謀殺隋文事泄被誅

高祖即位追封畢王

郇王禧高祖從父武德初追封

蔡王蔚高祖從父武德初追封

西平王安蔚子武德初追封

濟南王哲安弟武德初追封

雍王繪高祖從父武德初追封

河南王贄繪子武德初追封

東平王韶贄弟武德初追封

梁王澄蜀王湛漢王洪皆高祖兄並早卒武德初追封

衛王玄霸高祖子早薨武德元年追封謚曰懷

楚王智雲高祖子大業末從高祖於河東及義師將起
建成潛歸太原以智雲年小委之而去因為吏所簿送
于長安為陰世師所害義寧元年追封楚國公武德元

年進封王謚曰哀

寧王憲睿宗長子天寶元年十一月制曰能以位讓為
吳太伯存則用成其節歿則當表其名非常之稱旌德
斯在故太尉寧王憲誕含粹靈允膺大雅孝悌之至本
乎中誠仁和之深非繇外獎率繇禮度雅尚文儒謙以
自牧樂於為善比兩獻而有光與二南而合德自出臨
方鎮入配台階逾勵忠勤益聞周慎實謂永為藩屏以
輔邦家曾不憖遺奄焉殂沒友于之痛震動良深惟王

朕之元昆合升上嗣以朕奉先朝之睿略定社稷之阽危推而不居請予主鬯又承慈旨焉敢固違不然者則震極之尊豈歸于薄德茂行若此易名是憑自非大號孰副休烈按謚法推功尚善曰讓德性寬柔曰讓敬追謚曰讓皇帝宜令所司備禮冊命冊曰皇帝若曰於戲古者崇德考行猶謚大名飾終追遠亦應徽冊况乃元昆之戚天倫之重豈循常典者哉咨爾故太尉寧王憲純粹秉靈冲和成量孝友之性發乎天然仁義之道彰

乎日用加以好賢不倦樂善有聞休問掩於間平清猷
光於魯衛實謂儀刑邦家保祐藩維景命不融奄從薨
逝興言震動哀疚纏懷惟王地居元子合膺主鬯昔朕
上稟先訓克清羣兇遂固守撫謙懇讓儲副然則深仁
厚德茂行已表於生前寶位尊名盛禮寧忘於歿後是
用謚王為讓皇帝令遣使尚書左丞相耀卿副使太常
卿韋縉等持節禮冊因心之感備物飾情瞻典策而哀
深想棣華而望絕所冀幽窆嘉茲寵榮

申王撫睿宗子開元十二年薨制曰德盛者必享休名
道高者必膺殊典况人倫之重義切因心天屬之深情
殷追遠故司徒申王撫叡哲聰明本乎天性溫恭孝友
挺自生知樂善好書清猷邁於兩獻深仁厚義美化侔
於二南可謂具瞻百寮儀刑列辟朕將永康兆庶方自
友于天不憖遺奄從薨逝永惟仁範哀慟纏懷用表非
常之榮少寄天倫之戚可追贈惠莊太子宜令所司備
禮就加冊命陪葬橋陵以禮部尚書蘇頲為喪葬使京

兆尹李休光為副使尚書左丞楊承令為鹵簿使遣侍
中攝太尉元乾曜持節冊曰維開元十二年十一月甲
申皇帝若曰於戲夫緝禮所以飾情崇名所以表德義
存追遠愛洽因親惟故司徒申王為璿極稟虛邦家維
翰體孝友以成性用淳和而合道沛獻受易率以鳴謙
河間聚書時其好學加以出為方伯弘宣六條入登司
徒大敷五教而天則不愆奄薨於行留邸無期同氣遂
遠興哀痛震動於厥心夫先王演親親之恩春秋著加

等之義上嗣之位飾終斯在宜率茂典以永徽猷魂而有靈式昭哀贈

岐王範睿宗子開元十四年薨陪葬橋陵制曰褒崇名器所以尊德也光昭典禮所以飾終也况天倫之愛親親之至乎故太子太傅上柱國岐王範特稟聰明率繇孝友好書不倦樂善無忘固已作則列藩儀刑百辟方憑魯衛之政率流雍穆之風豈圖輔德愆期殲良奄及想同氣而莫遂望驂駕而何追言念平生情深震動宜

加殊禮之命用寄孔懷之哀可追贈惠文太子

薛王業睿宗子開元二十一年薨明年冊贈惠宣太子
隋王隆悌睿宗子也初封汝南郡王早薨唐隆元年追

贈

義豐郡王光順桂陽郡王守義皆章懷太子賢之子也
先天二年三月太上皇詔追封光順為莒王守義為畢王
慶王琮玄宗長子天寶十一載薨贈靖德太子後肅宗
元年建寅月詔曰聖人立號天下至公膺其美者必歸

有德有其德者或無其位苟徽烈可紀則追崇之典行焉況義貫因心禮優加等稽夫往策抑有前聞盛業鴻猷久不可替故靖德太子琮慶鍾霄極親則朕兄性與天道行高時望宣慈惠和聰明睿哲四科兼綜一以貫之而福壽不遐既隨往運緬惟友愛實軫于心朕昔踐儲宮顧誠非次於君人之命所不敢違以少長而言豈忘其序每思懇讓竟莫獲從遠順聖慈嗣茲寶位安可不申夙志有闕推恩宜加尊異之名載茂哀榮之典敬

用追謚曰奉天皇帝妃竇氏曰恭應皇后宜委有司即
擇日冊命更以禮葬仍令右僕射晁充使監護少府竇
履信為副

榮王琬玄宗子天寶十四載薨贈靖恭太子

夏王一玄宗子開元五年孩孺而薨追封夏王謚曰悼
懷王敏玄宗子纔晬開元八年二月薨封懷王謚曰哀
建寧郡王倓肅宗第三子天寶中封肅宗至靈武為張
良娣李輔國所搆賜死代宗即位追贈齊王大厯三年

五月詔曰故齊王俠承天祚之慶保鴻名之光降志尊
賢高才好學藝文博洽智畧宏通斷必知來謀皆先事
識無不達理至逾精乃者寇盜橫流變輿南幸先聖以
宸扆之戀將侍君親惟王以宗廟之重誓寧家國克協
朕志載符天時立辨群議之非同獻五原之計中興之
盛實藉竒功景命不融早從厚窆天倫之愛震惕良深
流涕追封胙于東海傾加表飾未極哀榮夫以參舊邦
再造之勤成天下一家之業而存未峻其等沒未尊其

稱非所旌徽烈明至公也朕以眇身纘膺大寶不及讓王之禮莫申太弟之嗣所懷靡從追想逾切非常之命寵錫攸宜敬用追謚曰承天皇帝與興信公主第十四女張氏冥婚謚曰恭順皇后有司准式擇日冊命改葬于順陵仍祔於奉天皇帝廟同殿異室焉

衛王佖肅宗第四子天寶中封西平郡王早薨寶應元年五月追封

鄆王榮肅宗第八子天寶中封靈昌郡王早世寶應元

年追封鄆王

恭懿太子侶肅宗第十二子至德二年封興王上元元年薨
詔曰厚禮所以飾終易名所以表行况情鍾天屬寵及褒封
載疇加等之美式備元儲之贈永懷軫念有惻彞章第十
二子故興王侶毓慶璿源分華若木天資純孝神假聰
明河間聚書幼聞樂善之旨延陵聽樂早得知音之妙
頃以暫嬰沉瘵殆積旬時而資敬益章穎晤逾爽愛親
之戀言不間於斯須告訣之詞事先符於夢寐顧惟至

性實切深哀將分土析珪載崇藩翰聞詩對易爰就琢
磨方異成立未虞天喪瑤英始茂遽摧於當春隙駟俄
遷忽沉於厚夜興言痛悼憫惜良深宜育寵於青宮俾

哀榮於玄窆可贈太子謚曰恭懿

詔薨時七八歲既薨之夕肅宗張后俱夢

詔有如平昔拜辭流涕而去帝方寢疾追念過深故特以儲嗣之贈寵之上疾累日方平

宋王儁肅宗第十四子早世建中二年正月追封

昭靖太子邈代宗第二子寶應元年封鄭王大厯九年

薨帝惜其才早夭冊贈昭靖太子

均王遐代宗第三子早夭貞元八年追封

荆王選代宗第十一子早世建中三年追封

靈溪郡王詠昭靖太子第二子大曆十年七月追封

代王謹德宗第八子本封縉雲郡王早薨建中三年正月追封

邕王諫順宗子德宗命之為子貞元四年封十五年十月薨時年十八贈文敬太子

晉王普敬宗長子太和二年詔曰王者重統紀尊儲副

所以上嚴國本祇叶禮經睦人倫以正邦典崇丕基而
昭彛式其或德契元良恩當追命道雖間於存歿義有
表於哀榮仰惟舊章用攄憫志故開府儀同三司晉王
普先帝冢嗣間氣風鍾孝敬發於岐嶷溫仁形於襁褓
翦珪分社光祝冊於參墟錫土啓藩假威尊於上黨朕
頃戡內難謬屬與能以王齒在嬰提事絕推讓方期就
傳謂致修齡既因猶子之義俾膺主鬯之選天不憖遺
殲我本枝泣悼永往空餘典禮嗟樂善而莫報顧卜起

而何追銜悲良慟此誠無極是用稽諸前訓申我宿愛
布曩懷於此日告如在于幽靈式備虛儀曷瘳深痛可
贈悼懷太子仍令有司擇日備禮追冊

梁永王義方太祖伯父韶王義談太祖叔父開平四年
追封

朗王存太祖仲兄唐乾符中與太祖俱逐黃巢中流
矢而卒開平四年四月追封

柳王友裕太祖長子唐末為華州節度使守興德尹天

祐元年卒開平五年追封

密王友倫太祖兄子唐末為宿衛都指揮使遙領容州節度使因會客擊鞠馬逸墜車而薨開平三年追封

安王友寧太祖兄子唐末遙領邕州節度使昭宗自奉鳳翔還降詔書以青寇未殄委之攻討友寧進師逼青州青人悉出大戰于石樓王師少却友寧自峻阜騎馳殿軍馬蹶仆為敵人所及而薨開平三年追封

晉陳王重杲高祖子幼亡天福六年五月追封

福王德高祖弟後唐末為沂州馬步軍都指揮使天福初贈太傅七年正月贈太尉追封

通王殷高祖弟天福初贈太傅七年正月贈太尉追封
廣王威高祖弟後唐末為彰聖后第三軍都指揮使長州刺史天福初贈太傅七年正月贈太尉追封

號王重英高祖子天福二年正月贈太保七年正月贈太傅追封

壽王重義高祖子天福二年權東都留守遇害贈太傅

七年正月贈太尉追封

鄭王重胤高祖子天福二年正月贈太保七年正月贈太傅追封

沂王重信高祖子天福二年為河陽節度使遇害贈太尉七年正月贈太師追封

夔王重進高祖子天福二年正月贈太保七年正月贈太傅追封

韓王暉高祖弟為曹州防禦使以疾終於官歸葬太原


天福八年追封

周鄭王侗杞王信皆太祖子乾祐末遇害廣順元年二月詔以故第二子青哥贈太保賜名侗第三子意哥贈司空賜名信顯德四年四月制曰禮以緣情恩以悼往矧在友于之列尤鍾惻愴之思故皇弟贈太保侗贈司空信等玉葉聯芳金莖比瑞屬景運之初啓何大年之不登未剪桐珪連雕棣萼俾予終鮮實動永懷既登叙以無階在疏封而豈恡贈其王爵慰我天倫侗追封郊

信追封杞王

越王誼吳王誠韓王誠皆世宗子乾祐末遇害廣順元年二月太祖詔故皇孫三人宜哥贈左驍衛大將軍賜名誼二哥贈左武衛大將軍賜名誠三哥贈左屯衛大將軍賜名誠顯德四年四月制曰父子之道聖賢不忘再思夫闕之端愈動悲良之抱故皇子贈左驍衛大將軍誼贈左武衛大將軍誠贈左屯衛大將軍誠等鳳雛龍翰常聳其殊姿玉折蘭摧早罹於非禍載惟往事有足

傷懷宜贈一字之封仍贈三台之秩表吾追念慰乃英
靈誼追封越王誠追封吳王誠追封韓王



冊府元龜卷二百九十六